

ତୀତସଙ୍କ ନିକଟକୁ ପାଉଲଙ୍କ ପତ୍ର ତିତସଦି ଲାକ୍ତୁ ପାଉଲଦି ଆକୁ ତିତସ ଆକୁ ବିସୟତାନ୍ ଏସ ମାଟା

ପାଉଲ ନାଲିଗି ଆକୁ ଲୋଇରାନ୍ ତିତସ ବଇ ଉନ୍ତ୍ରୁ । ଆମାକାକି ଉନ୍ତ୍ରୁ ମଣ୍ଡୁଲି ବାଦ୍ଲୁ ଲୋକ୍ତିଙ୍ଗ୍ ପରିଚୟ ସିନାଡ୍ । ଆଇ ମୁନ୍ତ୍ରୁ ଆକୁ ଆଜିନେ, ୧ ତିମତି, ୨ ତିମତି, ମାରି ପିଲିମନ ଇକେଙ୍ଗ୍ । ପାଉଲ ତିତସତିଙ୍ଗ୍ ରାସ୍ନାନ ଜେ, ଝାନ୍ ଏଣ୍ଡେସ୍ ଝିଜେରି ଆଗ୍ତି ନାଣ୍ଡ ଆଉଲି ଆଜି ଇୟା ଆକୁ ପଡାନାନ୍ । ପ୍ରେରିତ ଝାଜା ଝାନି ଜଗ୍ତି ବିସୟ ବୁଜାକିନା ସିନାନ୍ । ଇକା ଏସମାନ୍ ତିତସ ଆଗ୍ତିରାନ୍ ନେସ୍ତାମାନାନ୍ । ଆନାଡ୍ସୁଗି କ୍ରିସ୍ତଦି ଜନମତି ୬୩ ଦାନ୍ ୬୫ ଲୋଇ ପାଉଲ ଇୟା ଆକୁ ରାସ୍ତେଙ୍ଗ୍ ଆଟ୍ନାମାନାନ୍ ।

ପାଉଲ କ୍ରିତିଦି ଦେସ୍ତୁ ମାନି ମଣ୍ଡୁଲିଙ୍ଗ୍ ସାଲାକିଦେଙ୍ଗ୍ ତିତସତିଙ୍ଗ୍ ଆଦେସ୍ ସିନାନ୍ । ଆୟା ସାମାନ୍ ସିକିୟା ତିମତିଦିଙ୍ଗ୍ ବା ସିତାମାନାନ୍ । ପାଉଲ ଇୟା ଆକୁଦୁ ତିତସତିଙ୍ଗ୍ ମଣ୍ଡୁଲିଦି ପେରି ଝାରିଙ୍ଗ୍ ଆସକିନିକା ମାରି ସିକିୟା ସିନି ବିସୟତାନ୍ ରାସ୍ନାନ । ନେର୍ଡି ମଣ୍ଡୁଲି ମାରି ମଣ୍ଡୁଲିଦି ପେରିଝାରି ଦାୟିଡ୍ କିନି ଉଣ୍ଡିଙ୍ଗ୍ ମାପୁରୁଦି ବଦା ଇସାବ୍ତାନ୍ ଏଣ୍ଡେସ୍ ନାନି ଜଗ୍ ଆନିକା ଦର୍କାଡ୍ ଜାତୁନ୍ତାନ୍ ଦିୟାନ୍ ସିନିକା ମାନାଡ୍, ଆକା ସିଟିଦୁ ରାସ୍ନାନ ।

ଇୟା ଆକୁଦୁ ମାନି ମୁକିୟ ବିସୟ

୧. ପାଉଲ ତିତସତିଙ୍ଗ୍ ଦାର୍ମୁଦି ଲୋକାଙ୍ଗ୍ ଆସକିନି ଉଣ୍ଡିଙ୍ଗ୍ ଆଦେସ୍ ସିନାନ୍ । ୧:୧-୧୬
୨. ତାନିଝେନ୍କା ଝାନ୍ ବା ଲୋକାଙ୍ଗ୍ ଦାର୍ମୁଦି ଜିନିମାଡିଦେଙ୍ଗ୍, ଆମାକା ମାପୁରୁଙ୍ଗ୍ ନେଗେନ୍ କିନାଡ୍, ଆୟା ବିସୟତାନ୍ ସିକିୟା ସିଦେଙ୍ଗ୍ ଆଦେସ୍ ସିନାନ୍ । ୨:୧-୩:୧୧
୩. ସାରାସାରି ଝେନ୍କା ପାଉଲ ଝାନି ସାରାସାରି ମାଟା ଝେରୁସି ଝିସ୍ନାନ୍ । ୩:୧୨-୧୫

^୧ ପାଉଲ, ମାପୁରୁଦି ଦାସ୍ ମାରି ଜିସୁ କ୍ରିସ୍ତଦି ଅରେନ୍ ପ୍ରେରିତ ସିସୁ । ତିତସଦି ଲାକ୍ତୁ ଇୟା ଆକୁ ଆସସିନା ।

ମାପୁରୁଦି ବାସେଆତି ଲୋକା ବିସ୍ବାସତିଙ୍ଗ ତାଟ୍ କିନି ଉଣ୍ଡିଙ୍ଗ୍ ମାରି ଏସାଙ୍ଗ୍ଫିଜ୍ଜିବନ୍ ପୟ୍ନି ଆସା ମୁସକୁ ରାସାତିମାନି ମା ଦାମ୍ବୁବିସ୍ବାସତି ସତ୍ ଉଣ୍ଡିଙ୍ଗ୍ ଖାରିଙ୍ଗ୍ ଜାଗାରତା କିଦେଙ୍ଗ୍ ଇଜି ନାନୁ ପକାୟ୍ ଆତାମାନା ।

^୨ ପୁର୍ବେଦି କାଡ଼ାଦାନ୍ ମାପୁରୁ ମାଙ୍ଗ୍ ଇୟା ଏସକାଙ୍ଗ୍ଫିଜ୍ଜିବନ୍ ଦାନ୍ ସିଦେଙ୍ଗ୍ ପାର୍ମାଣ୍ କିତାମାନାନ୍ ମାପୁରୁ ମିସ୍ଫେରୁନିକାନ୍ ଆଏନ୍ ।

^୩ ମାରି ଟିକ୍ ଝେଡ଼ାଦୁ ଇୟା କାରୁର୍ ଝାନ୍ ଝେକ୍ତାମାନାନ୍ । ମା ରକିୟାକିନି ମାପୁରୁଦି ଆଦେସ୍ତାନ୍ ଇକା ଝେର୍ତେଙ୍ଗ୍ ନାଙ୍ଗ୍ ଦାୟିତ୍ ସିଆୟ୍ ଆତାମାନାତ୍ ।

^୪ ନା ଝିଜୁ ବିସ୍ବାସସିର୍ ମାରି ଇୟା ବିସ୍ବାସ ଉଣ୍ଡିଙ୍ଗ୍ ଟିକ୍ତାନ୍ ନା ମାରିନ୍ ତିତସଦି ଲାକ୍ତୁ ନାନ୍ ଇୟା ଆକୁ ରାସସିନା :

ବୁବା ମାପୁରୁ ମାରି ମା ରକିୟାକର୍ତ୍ତା କ୍ରିସ୍ତ ଜିସୁ ମିଙ୍ଗ୍ ଦୟା ନି ସାନ୍ତି ସିପିନ୍ ।

କ୍ରିଷ୍ଟୁ ତିତସଦି ପାଣି

^୫ ଆବେନ୍ ଏସଗୋଟା ବିସୟ୍ତି ନେଗିନିୟମ୍ କିଦେଙ୍ଗ୍ ମାରି ଇୟାଉଣ୍ଡିଙ୍ଗ୍ ଝିଜୁ ଗାଡ଼ାକା ମଣ୍ଡୁଲିଦି ପେରିନେତାରିଙ୍ଗ୍ ଆସକିନି ଉଣ୍ଡିଙ୍ଗ୍ ମିଙ୍ଗ୍ ନାନ୍ କ୍ରିଷ୍ଟୁ ତ୍ରିସ୍ତା ଝାତାମାର୍ହା । ଇୟା ବିସୟ୍ତାନ୍ ନା ମାଟେଙ୍ଗ୍ଫିଜ୍ଜି ଏଡ୍ କିଦୁ,

^୬ ମଣ୍ଡୁଲିଦି ନେତା ଝାଜା ଆନି ନିୟା ସିଲି ଲୋକ୍ ଆନିକାମାନାତ୍ । ଝାନ୍ ଅରେଡ୍ ଆଇମାଦି କନ୍ଲି ଆନାମାନାନ୍ ମାରି ଝାରି କଡ଼ର୍ ବିସ୍ବାସ୍ ଆନାମାନାର୍; ସାନ୍ତି ମାରି ଅବାଦ୍ୟ ଇଜି ଝାରି ତାଗ୍‌ଇପାଣି ସିଲେଡ୍ ।

^୭ ମାପୁରୁଦି ପାଣିଦୁ ଦାଇଡ୍ତୁ ମାନି ମଣ୍ଡୁଲିଦି ନେତା ପୁରା ନିୟା ସିଲିକାନ୍ ମାନିକା ମାନାତ୍ । ଝାନ୍ ତାଗ୍‌ଇକାନ୍ ନି ଗିଦ୍‌ରିଆନିକା

ଆଏନ୍ ମାନାନ୍, କାଡ଼ ଉଣିକା ନି ଜାତିଜଗତା ମାରି ତାବୁକୁଲୋବ୍ ଆଏନ୍ ମାନାନ୍ ।

୮ ମାତର୍ ଖାନ୍ ନେଗିକାନ୍ ଆନାମାନାନ୍ ମାରି ଝିନ୍ନୁ ସତ୍ ବିସୟତିଙ୍ଗ୍ ସୁକ୍ ପୟଜିମାନାନ୍, ନିଜେଦିଙ୍ଗ୍ ଇଡ଼ନିକା, ନ୍ୟାୟ, ନେଗିବୁଦି ମାରି ନିୟମ୍ବୁପୁରା ଆନା ମାନାନ୍ ।

୯ ମା ନେଗି କାବୁରୁତୁ ଖାନ୍ ତାବ୍ତାନ ବିସ୍ବାସ୍ କିଜିମାନାର୍, ଇୟା ବାକ୍ୟ ସତ୍ତି ଦାମ୍ବୁଦି ବୁଦି ମୁସ୍କୁ ଇଡ଼ଜି ମାରି ଝିନ୍ନୁଦାନ୍ ଆସାଦିଜଗ୍ । ଇୟା ବାକ୍ୟଦୁ ସତ୍ ସିକିୟାଦାନ୍ ଆଇଖାରିଙ୍ଗ୍ ଝେରତେଙ୍ଗ୍ କିଦେଙ୍ଗ୍ ମାରି ତେନିଙ୍ଗ୍ ବିରଦ୍ କିଜିମାନି ଲୋକା ବୁଲ୍ତିଙ୍ଗ୍ ଆକ କିଦେଙ୍ଗ୍ ଖାନି ସାସ୍ ମାନାଡ଼ ।

୧୦ ଗାଦିଲୋକ୍, ବିସେସ୍ କ୍ରିଷ୍ଟାନ୍ଦାମ୍ବୁ ମାନାତିମାନି ଜିହୁଦିରି ଜୁଦ୍ କିଜି ତାଗ୍ଲ ମାଗାଦାନ୍ ଆଇଖାରିଙ୍ଗ୍ ଜାସେ କିଜିନାର୍ ।

୧୧ ଖାରି ଝେୟ୍ ମୁକ୍ତେଙ୍ଗ୍ ଆନାଡ଼, ଇରିଙ୍ଗ୍ ଖାର୍ ସେମାର୍ ଆଏଶ୍ବା କେବଲ୍ ତାବୁଙ୍ଗ୍ ପୟନି ଇସାବତାନ୍ ତାଗ୍ଲ ସିକିୟା ସିଜି ନାଶ୍ ଇଲୁପରିବାର୍ତି ଲୋଇ ଅସାନ୍ତି କିଜିନାର୍ ।

୧୨ କ୍ରିତିଦି ଲୋକା ବିସୟତାନ୍ ଖାରିମାଶୁକୁ ଅରେନ୍ ବାବବାଦି ଇର୍ହାମାନାନ୍ : କ୍ରିତିୟର୍ ଝିନ୍ନୁଦିନ୍ ମିର୍ ଝେରନାର୍, ଖାର୍ ପାର୍ଗାନରେସ୍ ପସୁଖଜା ମାରି ଗାଡ଼ିଆପେଟୁ ମାନାର୍ ।

୧୩ ଖାରି ଇୟା ସାକ୍ୟ ପୁରା ସତ୍ । ମାରି, ମିର୍ ଆୟାଖଜା ଲୋକାଙ୍ଗ୍ ନାଶ୍ ଜାଗାର୍ତା କିଦୁ । ଆତିଙ୍ଗ୍ ଆୟାମାଶୁକୁ ଖାର୍ ନେଗି ଦାମ୍ବୁ ବିସ୍ବାସ୍ତି ଉଣ୍ଡିଙ୍ଗ୍ ଡେସି ଖାନାର୍ ।

୧୪ ସତ୍ତିଙ୍ଗ୍ ମାନାଜିମାନି ଲୋକ୍ତି ନିତିନିୟମ୍ବୁତିଙ୍ଗ୍ ମାରି ଜିହୁଦିରି ଖାର୍ଲ କାତେଆଙ୍ଗ୍ ବନ୍ଦ୍ କିଦେଙ୍ଗ୍ ଖାରିଙ୍ଗ୍ ସିକିୟା ସିଦୁ ।

୧୫ ନେଗି ଲୋକା ଉଣ୍ଡିଙ୍ଗ୍ ଝିନ୍ନୁନେ ପବିତ୍ର; ମାତର୍ ତାଗ୍ଲକା ଅବିସ୍ବାସ୍ପିର୍ ଇନି ବିସୟବା ପବିତ୍ରତା ମାନାଏର୍, ଇରିଙ୍ଗ୍ ଖାରି ମୋନ୍ ନି ବୁଦି ତାଗ୍ଲକା ।

୧୬ ଖାର୍ ମାପୁରୁଙ୍ଗ୍ ନେସ୍ତାମାନାପ୍ ଇଜି ମାନାନାର୍, ମାତର୍ ଖାରି ପାଣିଦାନ୍ ଖାନିଙ୍ଗ୍ ମାନାଏର୍; ଖାର୍ ଆକାର୍ ମାରି ତାଗ୍ଲକାର୍ ଇନି ସତ୍ପାଣି ପୁରା କିଦେଙ୍ଗ୍ ଖାର୍ ଜଗ୍ ସିଲେର୍ ।

୨

ସତ୍ତା ଦାର୍ମପାଣି

୧ ମାତର ମିର ନେଗି ସିକିୟାଦି ନେଗି ମାଟା ଖେରତୁ ।

୨ ପେରିପେରିଝାରିଙ୍ଗ୍ ମାନାଦେଙ୍ଗ୍, ବିସାରକିନି ମାରି ନିଜେଦିଙ୍ଗ୍ ଡାଟ୍‌ଇଡ଼ଦେଙ୍ଗ୍ ଅନୁରଦ୍ କିଦୁ; ଖାର ଟିକ୍ ବିସ୍‌ବାସ୍, ଜିବନ୍‌ନୋନିକା ନି ସାସ୍‌ତାନ୍ ପୁରାବତ୍ ଆପିର ।

୩ ବୟସତି ଆଇମେକାଙ୍ଗ୍ ପବିତ୍ର ଜିନି ମାଡ଼ିଦେଙ୍ଗ୍ ସିକିୟା ସିଦୁ । ଖାକୁ ଆଇ ଲୋକା ସୁରିମାଟା ଖାରଗିମାକିଝି, କାଡ଼ ଉଣିମାନୁ ଦାସ୍ ଆମାକିଝି ।

୪ ମାପୁରୁଦି ବାକ୍ୟ ଏଣ୍ଡେସ୍ ନିଦା ଆଏଡ଼, ଇୟାଉଣ୍ଡିଙ୍ଗ୍ ଖାର ଆଇଲିକାଙ୍ଗ୍ ନିଜେଦି କନ୍‌ଲିରିଙ୍ଗ୍ ମାରି କଡ଼ରିଙ୍ଗ୍ ଜିବନ୍‌ନୋନି ଉଣ୍ଡିଙ୍ଗ୍ ସିକିୟା ସିଦୁ,

୫ ଆରତିଙ୍ଗ୍, ଖାକୁ ପବିତ୍ରତା, ନେଗି ଇଲ୍‌ତି ଆଇମା, ଦାର୍ମ୍, ମାରି ନିଜେଦି କନ୍‌ଲିଙ୍ଗ୍ ମାନାପିଉ, ମାଙ୍ଗ୍ ସିଆୟ୍ ଆତିମାନି ମାପୁରୁଦି କାରୁର ବିରୁଦ୍‌ତାନ୍ ଏନ୍‌ ଇନି ନିଦା କିଦେଙ୍ଗ୍ ଆଟ୍‌ଏର୍ ।

୬ ଆୟାଝାଜା ମୁରୁଲିଆଙ୍ଗ୍ ଝିଜୁ ବିସୟ୍‌ତାନ୍ ନିଜେଦିଙ୍ଗ୍ ଡାଟ୍‌ଇଡ଼ଦେଙ୍ଗ୍ ଅଜା କିଦୁ ।

୭ ଝିଜୁ ବିସୟ୍‌ତାନ୍ ସତ୍‌ପାଣି ପୁରା କିଜି ମିର ନିଜେଦି ଜିବନ୍‌ତୁ ନେଗିକା ତରତୁ । ନେଗିମୋନ୍‌ତାନ୍ ମାରି ବୁଦିଦାନ୍ ନେଗି ବାସାଦାନ୍ ସିକିୟା ସିଦୁ ।

୮ ଆରତିଙ୍ଗ୍, ଏନ୍‌ ମିଙ୍ଗ୍ ସୁରି ଖାରଗିଦେଙ୍ଗ୍ ଆଟ୍‌ଏନ୍ ମାରି ଏଣ୍ଡେସ୍ ମି ସାତୁରୁ ମା ବିରୁଦ୍‌ତାନ୍ ଇନି ତାଗ୍‌ଇ ମାଟା ଇନ୍‌ଡ୍ରେଙ୍ଗ୍ ଆଟ୍‌ଏଜି ସେମାର୍ ଆନାର୍ ।

୯ ଦାସ୍‌କୁ ମାଲିକ୍‌କାଙ୍ଗ୍ ମାନାଜି ଝିଜୁ ବିସୟ୍‌ତୁ ଖାରିଙ୍ଗ୍ ସିକିୟା ସିପିର; ମାଲିକ୍‌କା ମାଟାଦିଙ୍ଗ୍ ଡେସି ଖେର୍‌ମାକିର୍ ।

୧୦ ଖାର ଡଙ୍ଗା କିଏଣ୍‌ଗା, ଝିଜୁଦିନ୍‌ ନିଜେଦି ସାଦୁ ମାରି ବିସ୍‌ବାସ୍‌ତି ପରିଚୟ୍‌ ସିପିର । ଆରତିଙ୍ଗ୍, ଖାରି ଝିଜୁ ପାଣିକିତି ଖେନ୍‌କା ମାଙ୍ଗ୍ ରକିୟାକର୍ତ୍ତା ମାପୁରୁଦି ବିସୟ୍‌ତାନ୍ ମା ଦାର୍ମ୍ ସିକିୟାଦିଙ୍ଗ୍ ଗୌରବ୍ କିନାର୍ ।

୧୧ ଇରିଙ୍ଗ ଝିନ୍ନ ଲୋକାଙ୍ଗ ରକିୟା ଉଣ୍ଡିଙ୍ଗ ମାପୁରୁଦି ଦୟା
ଝେଙ୍ଗିତା ମାନାତ୍ ।

୧୨ ମାରି, ଖାନି ଆୟା ଦୟା ଉଣ୍ଡିଙ୍ଗ ଦାମ୍ବୁସିଲିକା ମାରି ଦୁନିଆ
ଆସାଦିଙ୍ଗ ଡିସିସି, ଇୟା ଜୁଗୁଡୁ ନେଗିବୁଦି, ଦାମ୍ବୁ ମାରି ଦାମ୍ବୁ ଖଜା
ଜିନାଟ୍,

୧୩ ମାରି ଆୟା ଝେଡ଼ିକାଦି ଆସା ମାରି ମା ପେରି ମାପୁରୁ ନି
ରକିୟାକିତିକାନ ଜିସୁ କ୍ରିସ୍ତୁଦି ଗୌରବ ଝେଙ୍ଗିଦେଙ୍ଗ ସୋଲ୍‌ସିନାଟ୍,
ଆୟା ଦିନତିଙ୍ଗ କାପକିଜି ମାପ୍ ତେବାତାମାନାପ୍ ।

୧୪ ☆ଆୟା କ୍ରିସ୍ତ ଜିସୁ ମାଙ୍ଗି ଝିନ୍ନ ତାଗୁଇ ପାଣିଦାନ ଡିସିସି
କିଦେଙ୍ଗ ମାରି ନିଜେଦି ଉଣ୍ଡିଙ୍ଗ ସଡ଼ପାଣିଦୁ ଝେଡ଼ିକାଆଜି ନିଜେଦି
ଲୋକା ଖଜା ପୁରା ନେଗେନ୍ କିଦେଙ୍ଗ ମା ଉଣ୍ଡିଙ୍ଗ ନିଜେଦିଙ୍ଗ
ସିଆୟାଆତାନ ।

୧୫ ଇୟାଝିନ୍ନ ବିସୟ ଅଜା କିଦୁ ମାରି ମି ପୁରା ତାଟତାନ ଲୋକାଙ୍ଗ
ଝେଡ଼ିକା କିଦୁ । ଖାରିଙ୍ଗ ଝେଡ଼ିସି ଜାଗୁରାତା କିଦୁ, ମିଙ୍ଗି ଏନ୍
କାଡ଼ମାକିନ୍ ।

୩

କ୍ରିଷ୍ଟାନତି ସାଲାବୁଲାନିକା

୧ ସାସନକିନି ମାରି ଅଦିକାର ପୟତି ଲୋକା ଆଡ଼ଗି ମାନଜି ଖାରି
ଆଦେସ୍ ମାନାଦେଙ୍ଗ ମାରି ଝିନ୍ନ ସଡ଼ପାଣିଦୁ ସାକା କିନି ଉଣ୍ଡିଙ୍ଗ
ତିଆର୍ ଆଦେଙ୍ଗ ମଣ୍ଡୁଲିଦି ପେରିଖାରିଙ୍ଗ ଏଡ଼ କିବିସ୍‌କିଦୁ ।

୨ ଏ ନିଦା ମାଟା ଖାରିଗିଏଣ୍‌ଗା ସାନ୍ତି ମାରି ସଙ୍ଗତି ଖଜା
ସାଲାଦେଙ୍ଗ ମାରି ଝିନ୍ନ ଲୋକା ଉଣ୍ଡିଙ୍ଗ ନେଗି ପାଣି କିଦେଙ୍ଗ ଖାରିଙ୍ଗ
ଆଦେସ୍ ସିଦୁ ।

୩ ମାପ୍ ନିଜେ ଅର୍ଲେନ୍ ବୁଦିସିଲିକା, ମାନାଏଜି ମାରି ବାୟା
ମାର୍ହାପ୍, ଝିନ୍ନ ରକମ୍‌ତି ସୁକ୍‌ବୋଗ୍ ମାରି ତାଗୁଇ ବିସୟକାଙ୍ଗ ଝିନ୍ନ
ତେବାତା ମାର୍ହାପ୍; ଆକାର୍ ମାରି ରିସାଦାନ ଦିନକାଟେକିଜି ମାର୍ହାପ୍;
ଆଇକାର୍ ମାଙ୍ଗି କାଡ଼ଜି ମାର୍ହାପ୍, ମାପ୍ ବା ଖାରିଙ୍ଗ କାଡ଼ଜି ମାର୍ହାପ୍
।

୪ ମାତର ଏସ୍ତ୍ରାଈଲେ ମାଙ୍ଗୁ ରକ୍ଷାକିତି ମାପୁରୁଦି ଦୟା ମାରି ଲୋକା ଉଣ୍ଡିଙ୍ଗୁ ଖାନି ଜିବନ୍ନୋନିକା ଖେଙ୍ଗୁ ତାତ୍ ।

୫ ମା ସତ୍‌ପାଣିଦି ପଲ୍ଲୁ ଖାଜା ଇକା ଆଏଡ୍ । କେବଲ ଖାନି ଦୟାଦାନ ପବିତ୍ର ଆମ୍ବୁଦି ମୁର୍ନିମାଣାନ୍ ମା ପାପ୍ ଝିନ୍ଦୁ ନରାଇ ଆତାମାନାତ୍ ମାରି ମାପ୍ ପୁନି ଜନମ୍ ପୟ୍‌ଜି ରକ୍ଷା ପୟ୍‌ତାମାନାପ୍ ।

୬ ମାଙ୍ଗୁ ରକ୍ଷାକିତି ପ୍ରବୁ ଜିସୁ କ୍ରିସ୍ତଦି ମାଣାନ୍ ଇୟାଝିନ୍ଦୁ ପୁରା ଆତାମାନାତ୍ । ଖାନି ଉଣ୍ଡିଙ୍ଗୁ ମାପୁରୁ ମାଙ୍ଗୁ ନାଣ୍ଡଦାନ ପବିତ୍ରଆମ୍ବୁ ସିତାମାନାନ୍ ।

୭ ଖାନି ଦୟାଦାନ ମାପ୍ ମାପୁରୁଦି ଆଗୁଡି ଦାମ୍ବୁଦୁ ମିସାଜି, ମା ଆସା ଇସାବତାନ ଏସ୍‌କାଙ୍ଗୁଝିଜ୍‌ଜି ଜିବନ୍ଦୁ ସନ୍ତେଙ୍ଗୁ ସାରି ପୟ୍‌ତାମାନାପ୍ ।

୮ ଇୟା ମାଟା ପୁରା ସତ୍ ।

ଇୟାଝିନ୍ଦୁ ବିସୟ୍ ମୁସ୍‌କୁ ମିର ନାଣ୍ଡ ଦିୟାନ୍ ସିଜି ବୁଜାକିନିଦେର୍, ଆମାକାର ମାପୁରୁମାନୁ ବିସ୍‌ବାସ୍ କିନାର୍, ଖାର ସତ୍‌ପାଣି କିଜି ଦିନ୍ କାଟେକିନିକା ମାନାତ୍; ଝିଜେରି ଉଣ୍ଡିଙ୍ଗୁ ଆମାକା ନେଗିକା, ଆୟାଝିନ୍ଦୁ ପାଣିଦୁ ତେବାନିକା ମାନାତ୍ ।

୯ ମାତର ଆର୍‌ଏ ଲାଗାଜିସାନିକା, ପୁର୍ବେଦି ତକ୍ରାଦାଦାରି ନିର୍‌ଇ ଦରକା ଦାଡି ମାରି ସାସ୍ତ୍ର ଅସି ଆର୍‌ଏ ଜାଟି, ଆଉଲି ମାରି ଆସ୍‌ସିସାନିକା ଝିନ୍ଦୁ ଡିସ୍‌ତୁ । ଇକା ଇନିକାସିଲିକା ନି ବେକାର୍ ।

୧୦ ଜାଟି କିଜିମାନି ଲୋକ୍‌ଡିଙ୍ଗୁ ରୁଣ୍ଡି ଦେବେଙ୍ଗୁ ଜାଗୁରାତା ମାଟା ଖେରଡୁ, ଆର୍‌ଡିଙ୍ଗୁ ଖାନ୍ ଜଦି ଖେନ୍‌ଏନ୍ ଖାନି ଖାଲେ ମିସାବିଡ୍, ଡିସ୍‌ସୋ ସିଦୁ ।

୧୧ ମିର ନେସ୍‌ତିମାନିଦେର୍, ଇୟାଝାଜା ଲୋକ୍ ଏଣ୍ଡେସ୍ ସାରିବାଣାତାମାନାନ୍, ଖାନି ପାଣି ମାଣାନ୍ ଖାନ୍ ନିଜେଦିଙ୍ଗୁ ପାପ୍ ଇଜି ନିଜେ ପାର୍‌ମାଣ୍ କିନାନ୍ ।

ସାରାସାରି ମାଟା

୧୨ ☆ନାନ୍ ଏସ୍ତ୍ରାଈଲେ ମି ଲାକ୍‌ତୁ ଆର୍ଡେମା ନି ତୁକିକଦିଙ୍ଗୁ ପୋକ୍‌ତାନା, ନାସ୍ତ୍ରାଈଲେ ମିର ନିକପଲିଦୁ ଖାଦେଙ୍ଗୁ ଇଜି ସେସ୍‌ କିଦୁ,

ଈରିଙ୍ଗ ଆବେନ୍ ନାନ୍ ପିନିକାଡ଼ା କାଟେକିଦେଙ୍ଗ୍ ିବଦା କିତାମାନା
।

୧୩ ☆ସାସ୍ତ୍ରଗୁରୁ ଜିନା ମାରି ଆପୋଲୋଦି ବୁଲାନି ଉଣ୍ଡିଙ୍ଗ୍ ଆମା
ଆମାକା ଦରକାର, ଓଁଜୁ ଉଣ୍ଡା କିଜି ସିଜି, ସନିସାରିଦୁ ଖାରିଙ୍ଗ୍
ସାହାଜ୍ୟ କିଦୁ ।

୧୪ ସତ୍ପାଣିଦାନ୍ ଦିନ୍ କାଟେକିଜି ନିଜେ ନିଜେଦି ଆସା ପୁରା କିନି
ଉଣ୍ଡିଙ୍ଗ୍ ସିଲିସାତି ଲୋକାଙ୍ଗ୍ ସିକ୍‌ୟା ସିଦୁ । ଖାର ଆର୍‌ଏ ବାସ୍‌ସୋ
ମାନ୍‌ମାକିର୍ ।

୧୫ ଇବେନ୍‌ ନା ଖାଲେ ମାନି ଓଁଜୁ ଲୋକ୍ ମିଙ୍ଗ୍ ନମସ୍କାର୍
ଜାଣେକିଜିନାର୍ । ଓଁଜୁ ବିସ୍‌ବାସ୍‌ସିର୍ ବନ୍ଦୁରିଙ୍ଗ୍ ମା ନମସ୍କାର୍
ଜାଣେକିଦୁ ।

ମାପୁରୁଦି ଦୟା ମି ଓଁଜେରି ଉଣ୍ଡିଙ୍ଗ୍ ଆପିଡ୍ ।

ମାପୁରୁଦି ସବ୍ ବାକ୍ୟ

The New Testament in the Konda Porja Lanugage of India. Konda-Dora: ମାପୁରୁଦି ସବ୍ ବାକ୍ୟ (Bible)

copyright © 2020 The Word for the World International and Konda Porja Translation Samithi, Dasamanthpur, Odisha

Language: Konda Porja (Konda-Dora)

Contributor: The Word for the World South Asia

ମାପୁରୁଦି ସବ୍ ବାକ୍ୟ

ପୁନଃ ନିର୍ଦ୍ଦେଶ, 2020

The New Testament in Konda Porja Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

506ae627-08e2-556a-b39e-5315f886d95a